



Aqqalu C. Jerimiassen
Atassut

UPA 2024/56
8. maj 2024

Filmiliornermi aningaasartuutit utertinneqartarnerat pillugu Inatsisartut inatsisissaattut siunnersuummik saqqummiussinissamik Naalakkerusisut peqquneqarnissaat pillugu Inatsisartunut aalajangiiffigisassatut siunnersuut. Inatsimmi nunatsinni filmiliornermi aningaasartuutit 25 %-iinik utertitsinissaanissaq pisinnaanngortissavaa, maannalu aningaasanut inatsimmi oqaasertaliussa qaqutigalugu maleruagassiorneq taarsissallugu.

(Inatsisartunut Ilaasortaq Peter Olsen, Inuit Ataqtigiit)

Politikkerit pikkoriffigisarpaat oqaasiinnakkut tapersiisarneq. Politikkerit aamma sukataaruteqarnerartarput pimoorussinerarlutik, naak Inatsisartuni siunnersuummilluunniit saqqummiussisimannikkaluarlutik. Sulilu inuit nuannaartarput tapersernejartutut misigalutik.

Qinigaaffiullu ingerlanerani inuit kamassaat annertusiartuinnalertarpoq, utaqqikatattutut pissuseqalertarput, oqaatsillu sakkortuupilorujussuit atorsinnaasarlugit. Nammineq inuunermi artorsaatitik politikkerinut saatsillugit. Tassa uagutsinnut piviusoq. Ataasiaannarnatami allaat toqkkut siorasaarneqarsimavugut.

Sooruna politikkerit neriorsuinerlunnerujussuat uani aallarniutigigiga?

Politikkereqarmat aamma qinikkanik piviusunngortitsisinnaasunik, oqarluartaaginnangitsunik, kamassaariinnangitsunik, avissaartuutsitsiniaaginnangitsunik. Taakkulu qinikkat, partii sorlermeeraluaraangataluunniit nersualaagassaapput, taperserlugit, tigussaasumik oqalliseqatigalugit. Taakkuuppummi angusaqatigisinnaasagut. Peter Olsen, illittaaq nersualaagassaavitit anguniakkatit sukataarutigillaqqikkakkit, asuli suaartaannarnak.

Uanilu nunatsinni filmiliornermi tikilluaqqullugit suliaqarnissaannik periarfissiinnaalernissaq Atassummiit tamakkiisumik taperserparput. Oqartoqassajunnarsigaluarpoq ilaatigut film/serie produktionit annertuut, allaallu milliardikkaanik aningaasartuuteqartartut nunatsinni filmiliornermi artorsagalarpata akunnittarfiit, neriniartarfiit, angallannikkullu assartuinnikkullu nunatsinni pisinnaasagut, immaqaluunniit artunngisagut killeqartut.

Ilimagaarpullu aallaqqaataani artorsassasut, kissaatigineqartut pisariaqartinneqartullu eqquutsinniassallugit. Taamaattorli aningaasarpajorujussuarnik naleqarmata eqiiallatsitsissapput, ulapikkusuttut, aningaasarsiorluarusuttut suliffeqarfisik allisarsinnaalissallugu aana periarfissatsialak. Aningaasat avataaneersut nunatta iluani sulisillugit.

Naak akileraarutitigut nunatta karsiata iluanaarutissaralui ilanngartingaatsiartussaagaluartut oqartoqarsinnaavoq, taamaaliunngikkuttami aamma susoqarnaviannigilaq. Atassummiit suliffeqarfiit namminersortut taperserujussuarpagut, tassami taakku iluanaaruteqarluarsinnaapput allisarlutillu. Taavalu isiginnaartitsisarnikkut, filmiliornermi misilittagassarparujussuit periarfissanut akuulissallutik. Siunnersuut tamakkiisumik taperserparput.